



Broj: 01/1-50-1-1-53/08  
Sarajevo, 28.10. 2008. godine

## Z A P I S N I K

### 53. sjednice Ustavnopravne komisije

Sjednica je održana 28. 10. 2008.godine, s početkom u 10 sati.

Sjednici su prisustvovali članovi Komisije: Šefik Džaferović, Velimir Jukić, Martin Raguž, Lazar Prodanović i Halid Genjac.

Osim članova Komisije, sjednici su prisustvovali predstavnici Ministarstva pravde BiH ministar Bariša Čolak i Milana Popadić, Ministarstva sigurnosti BiH ministar Tarik Sadović, predstavnici medija i to: Elma Kazagić TV Hayat, Belma Muhić Dnevne novine „San“, Vanja Elezović TV Kiss, Rešad Dautbegović Dnevni list, Zoran Brkić iz Sektora za odnose s javnošću PSBIH.

Sjednici je prisustvovao stručni saradnik u Komisiji Nedžad Salman.

Komisija je jednoglasno usvojila sljedeći:

## D N E V N I R E D

1. Informativna sjednica o problemima korupcije i organiziranog kriminala, (**Razmatranje Izvještaja, mišljenja i zaključaka o pitanjima korupcije i organiziranog kriminala, Ministarstva Pravde BiH i Analize stepena implementacije Strategije BiH za borbu protiv organiziranog kriminala i korupcije, Ministarstva sigurnosti BiH u skladu s članom 162.Poslovnika Doma**).

### Ad. 1.

Predsjedavajući je pozdravio sve prisutne i dao uvodne napomene o Informativnoj sjednici povodom problema organiziranog kriminala i korupcije.

Nakon toga, predsjedavajući je otvorio raspravu u kojoj su učestvovali ministri Tarik Sadović i Bariša Čolak i članovi Komisije: Šefik Džaferović, Martin Raguž, Halid Genjac, Lazar Prodanović i Velimir Jukić.

Nakon opsežne rasprave Komisija je jednoglasno utvrdila sljedeće zaključke:

1. Ustavnopravna komisija ističe ozbiljnost situacije u kojoj se nalazi Bosna i Hercegovina kada je u pitanju stanje korupcije i organiziranog kriminala. Uz sve pozitivno učinjeno, ovo stanje zahtjeva strateški pristup na nivou Bosne i Hercegovine i koordinaciju i odgovornost svih.
2. Ustavnopravna komisija prima na znanje dokumente dostavljene od strane Ministarstva sigurnosti i Ministarstva pravde Bosne i Hercegovine o pitanjima korupcije i organiziranog kriminala i podržava prijedlog preporuka i zaključaka koji su sadržani u ovim dokumentima;
3. Komisija konstatuje da iz ovih informacija proizilazi da tamo gdje postoji sistemski i društveno organiziran pristup u borbi protiv korupcije i organiziranog kriminala tu i postoje rezultati, a tamo gdje takvog pristupa nema takvi rezultati izostaju;

4. Komisija smatra da je u Bosni i Hercegovini potrebno jačati institucionalni okvir i kapacitet u borbi protiv korupcije;
5. Treba identificirati sektore u kojima je organizirani kriminal i korupcija u izražaju i napraviti odgovarajuće akcione planove, tamo gdje nisu napravljeni, za borbu protiv organiziranog kriminala i korupcije, što se posebno odnosi na javni sektor;
6. Komisija izražava nezadovoljstvo dosadašnjim stepenom implementacije strategije za borbu protiv organiziranog kriminala i korupcije i zahtjeva da se ona implementira do kraja. S obzirom da Vijeće ministara BiH nije formiralo koordinaciono tijelo, Komisija zahtjeva da se u roku od 30 dana uspostavi koordinaciono tijelo za praćenje implementiranja postojeće strategije, kao i da se, do isteka važnosti postojeće, donese nova strategija;
7. Sve obaveze iz ove oblasti, koje Bosne i Hercegovina ima prema međunarodnim tijelima u kojima je ona član, kao i prema međunarodnim pravnim aktima, moraju se potpuno prihvatiti i implementirati;
8. Komisija smatra da tim za praćenje realizacije materijalnog i krivičnog procesnog zakonodavstva treba da sačini analizu da li u Bosni i Hercegovini postoji dovoljan zakonski okvir za uspješnu borbu protiv organiziranog kriminala i korupcije. Ovo se posebno odnosi na oduzimanje protivpravne imovinske koristi;
9. O svim preduzetim aktivnostima potrebno je upoznati najširu javnost Bosne i Hercegovine;
10. Potrebno je otvoriti saradnju sa nadležnim institucijama zemalja u regionu;
11. Komisija smatra da je neophodna puna odgovornost svih onih koji rade na ovom poslu, monitoring nad njihovim radom, te povećanje ukupnog stepena odgovornosti u našem društvu kada su ova pitanja posrijedi;
12. Materijali koje je Komisija dobila od Ministarstva sigurnosti BiH i Ministarstva pravde BiH, zajedno sa Izvještajem Ustavnopravne komisije, trebaju biti dostavljeni Predstavničkom domu na razmatranje i usvajanje.

S obzirom da nije bilo više pitanja, sjednica je završena u 12.30 sati.

**SEKRETAR KOMISIJE**  
**Igor Bajić**

**PREDSJEDAVALAČI KOMISIJE**  
**Šefik Džaferović**